

**COMUNICATO n. 1187 del 17/05/2025**

**Manà fora su Trentino Tv l program l vegn endrezà dal Comun General de Fascia**

## **“Pedies”: per en sabeda ai 17 de mé vegn fora la puntata #486 del program ladin per la televizion**

Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 486.

I argomenc de chesta setemèna. Cedean per i 45 egn di Schuhplattler de Ciampedel che i à fat gran festa en ocajon de la sègra del paisc. L era belavisa l 1980 canche de gra a la convinzion de don Tito l è stat metù su chest Grop che l è doventà n pont de referiment per duta la comunanza. Anchecondì l dombra 30 componenc, l tol ite ence eles e n grop de picoi bec. Sion jic a se fèr contèr zeche de più dal President Samuel Lazzer e da Stefano Lazzer che l era te anter i prumes fondadores.

A Pardac chisc dis pasé l é stat portà dant na scomenzadiva a chela che à tout pèrt la scoles profescionèles e la firmes da artejan de Fascia e Fiem. Te chesta ocajon ge é stat portà dant soraldut ai joegn i lurieres da artejan che l é te noscia valèdes ence col obietif de insegnèr l lurier e ge fèr entener l'emportanza de na profescion col recordèr che n mestier l pel arsecurèr n bon vadagn e dèr de gran sodisfazioni.

Chest an l'ACAT de Fascia la compesc si 40 egn. L pionier che l à metù su chesta sociazion l é stat Sergio Valle che te na intervista l ne conta de sia esperienza.

Anchecondì chesta organizazion, con a cef marino Pederiva, no la se cruzia demò del problem del alcol ma la é a la leta per didèr duc chi che à problemes de ogne sort.

La Union di Ladins de Fascia, tel chèder de la scomenzadives per l'Aisciuda Ladina de chest an, l'à endrezà na raida vin Gherdena per cognoscer na pèrt de noscia bela Ladinia. Col endrez del President Fernando Brunel l é stat fat na vijita al Museum de Gherdeina, a la geja de Sacun e ai mèjes de Peza e Mèune. Na di anter storia, cultura e toponimes ladins che l é ence l argument de l'Aisciuda Ladina 2025.

I report de chesta setemèna, enjigné da Riccardo Zanoner, Sabrina Riz e Angela Pederiva, i vegn porté dant co la ousc de Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 de TN**- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevijionLadina>

**Traduzion di Servijes Linguistics e Culturèi del Comun general de Fascia**

(cdt)